

SICILIA MARTURIATA

Sugnu Sicilianu e mi nni vantu,
Natu nta sta terra diliziusa,
Terra d'amuri, terra d'incantu,
Terra pruduttiva e calurusa.
La so vesti comu un riccu mantu,
Dutatu di la natura ginirusa,
Lu celu azzurru, mari argentatu.
Un quadru di Giottu pitturatu!

Grazzi Divinu Padri Onniputenti!
Pittasti, cu pinzeddu e la to' manu,
Biddizzi du livanti a lu punenti,
Li colli, la marina e lu vulcanu,
Li raggi di lu sulì cchiù lucenti,
Dunasti all'omu cantu e puisia,
Di li lacrimi la Matri a Siracusa
E a Piddirinu Santa Rusulìa.

Rosa, Rusidda mia, ti lu rammenti?
Era festa di santa Rusulìa,
Iò ti taliava e tu taliavi a mia.
Lu tò visuzzu allegru, risulenti,
Dirimi qualchi cosa mi vulìa;
T'insistivi fucusu e d'accussì
Tu rispunnisti e mi dicisti sì.

Chiddu chi ntisi dintra stu pettu,
Rusidda, puru tu la stissa brizza.
Era lu focu di la cuntintizza,
Era lu focu di lu granni affettu.
Li brividi, li carni pizza pizza,
Quannu ti strincivi a lu me pettu;
Rosa, Rusidda china di buntà,
Mi dasti lu cori e la filicità.

Viva la vita, viva la giuvintù.
Chi cosa nni resta nta stu munnu?
Beddi vint'anni chi nun tornanu cchiù!
Sparti di li mpirugghi chi ci sunnu;
Me nannu a vintun'anni dunnì fu'?
Ittatu nta un gadduni longu e funnu,
Fici la guerra, birsaglieri,
All'Africa cu Nitti e Baratteri.

Me nannu Cicciu, so frati Marianu,
So cugnatu Peppi, so niputi nToni,
Cumbatteru a Piantu Rumanu,
Cu Garibaldi, contru li Borboni.
Foru liquidati nta lu chianu,
Lassaru li famigghi ncunfusioni,
Dilusi, afflitti e avviliti,
Aspittannu li patri e li mariti.

Li nostri patri, nuddicati a stentu,
Sigueru puru u stessu passu.
Cu murìu a Triesti, cu a Trentu,
Gorizia, Fiumi e nta lu Carsu;

Cumbattennu tra Piavi e Tagghiamentu,
Vitturiusi ficiru gran passu.
Sunnun passati cinquant'anni bboni
E vannu murennu senza la pinsioni.

Niatri omini di mezza età,
Ricordu la prima elementari,
Cammisa niura, giunnu fino ccà;
Lu corsu si facià premilitari,
Cu dicìa Duci, cu facià a-là-là,
Sempri unu e dui a lu marciari,
Marciannu sempri, vicinu e luntanu,
Cu cosci tisi e passu rumanu.

Si criscìa cu stu timpiramentu,
Spittannu da vinìri tempi bboni;
Inveci un colpu a tradimentu,
Li stati n'applicaru li sanzioni.
Pi lu populu fu granni spaventu
Avìri contru tutti li Nazioni.
Cunsidirati l'afflittu omu scarsu,
Aviamu lu pani cu cumpassu.

Nmezzu li malanni si marciava,
Lu manciari tuttu tissiratu,
All'Africa guerra chi nfucava,
NGrecia c'era lu focu addumatu,
All'Albania puru si sparava,
Guerra d'ogni puntu e d'ogni latu.
Di suldati ci nn'era na muntagna,
Chi nni parteru puru pi la Spagna.

Adunata civili e militari,
Parla lu Duci, populu ascultati,
Omini d'oltre monti e d'oltre mari,
Civili, militari e camerati.
Lu Duci vinni ad annunziari:
Grecia, Albania conquistati!
All'Africa i nostri chi vinceru,
L'Italia conquistau l'imperu.

Musica, festa strati strati;
Mi trovava nmezzu puru eu
Di sira cu li ciacculi addumati,
Canti, vuci, sfilati e trufeu.
Ora saremu tutti sistimati!
Cunsidirati lu populu chi preu!
La macagna di Suez nun sapìa
E la granni summa forti chi sirvìa.

A Suez lu forti e lu canali,
Ogni navi nostra chi passava
Pi ghiri all'Africa Orientali,
Quantu gran munita chi pagava!
C'era prezzu fissu pi quintali,
Contributu chi nun si supputtava,
Oru l'Italia nunn'avìa
E supputtava sta suvirchiaria.

Cunsidirati lu pupulu sfruttatu,
Cu tutti sti prublemi d'affruntari,
Laciru, afflittu, spidduzziatu,
Nun c'era tabaccu pi fumari.

Cu nostru granni imperu cunquistatu,
S'aspittava travagghiu e beni stari;
Inveci spunta un pantimomiu,
Vonnu puru la fidi du matrimoniu.

Ricordu comu ora, na matìna,
Un gruppu di pirsuni misi a coru,
Cu forgi nfucati d'officina,
Era la Patria chi cughìa l'oru.
Ogni patri, figghiu, ogni bambina
Ittava nta pignata lu tesoru;
Ncambiu pi ricivuta, soccu c'era?
Na piccula cinturetta di lamèra.

Giuvinnotti, liggiamu certi voti,
Nte mura scritturi allapazzati:
Si li culli sunnu vuoti
La Patria nvecchia e nni dicàti.
Tannu li facista cchiù divoti
Figghi nni ficiru a carrittati;
Quantu premi nta tuttu lu stivali,
Picciriddi ci nn'era n'arsenali!

Comu li virmicceddi terra terra,
Ci nn'eranu afflitti, spidduzzati.
L'America, la Germania, l'Inghilterra
Facianu li cannuna e li fragati;
Era manovra fatta pi la guerra.
L'Italia nuddicava li surdati,
All'età di vint'anni, nto cchiù bellu,
Nvagunati e mannati a lu macellu.

Accussì passau la nostra giuventù,
Tutta di misteri e di malanni,
Sempri mpirugghi, nun si nni putìa cchiù,
Nun vittimu passari li vint'anni.
Dopu ancora chiddu chi ci fu,
Scuntammu piccati, li cchiù granni.
Affacciau du balconi Mussulinu,
Chi fici l'assi Roma-Berlinu.

Appimu lu restu di li reschi,
Nni pirsiguitava la sfurtuna.
Quannu s'alliamu a li Tedeschi,
Tutti li firrati di balcuna,
Cancelli di ferru principeschi,
Smuntati pi fari li cannuna.
E li Chiesi di li campani alliggiuti,
Pi fari l'armi senza canusciuti.

Guerra dichiarava lu Francisi,
Lu Tedescu battìa la Maginotti,
Mentri niautri, nta lu trapanisi,
Quantu bumbardamenti, quantu morti!
Nmezzu li macèri, tisi tisi,
Li casi svintrati e senza porti,
Curriamu versu fora, li sfullati,
Durmennu terra terra e strati strati.

Sbandati, circannu un cufularu
Ncampagna, nto zu Cicciu, nto zu Bettu;
Ci fu cu capitau qualchi pagghiaru,
Cu mezzi mura, vecchi, senza tettu.

Tutti chi circavanu riparu,
Lu mastro, lu ngigneri, l'architettu;
E pi truvàri un chilu di patati,
Cangiavanu li giuelli cchiù prigiati.

Chiddu chi si facià pi sfamari,
C'era sfruttamentu e lu turruri:
Cu vinnìa carrubbi troppu cari,
Senza dignità, senza culuri.
Diversi fimmineddi, pi mangiari,
Pi un pani, cangiavanu l'onuri,
Alluggiati nte tani, terra terra,
Chi mariti e li figghi nguerra.

Sparavanu li cannuna, li fragati.
Lu stivali, di morti tuttu chinu.
Li surdateddi, nzemmula, mmiscati
All'Amiricani, luttavanu a Cassinu,
Partigiani contru Tedeschi scatinati
E contru l'esercitu di Mussulìnu.
La Mimmatti e l'Umpa chi sparava,
L'Amiricanu a tappitu bumbardava.

Quantu furtizzi nmezzu li stratuna,
Li linii firrati e la marina;
Nni sirveru tutti pi campiuna,
La strata naziunali tutta china.
Quantu gran sciupù di miliuna!
Li passaggi sbarrati cu catìna,
Lu galantomo all'alt si firmava,
Lu cuntrabbannista subitu passava.

Eranu furtizzi contru lu sbarcu,
Pi fari a lu nimicu focu siccu;
Inveci aspittavanu don Giaccu,
Manuvra cuntrullata a lu caiccu,
Pi cummiritusi fari lu sbarcu.
Infatti arrivaru Cocchi e Chiccu,
Du niuri, un Police Amiricanu,
Traseru, battennuci li manu.

L'Amiricani cu li camionetti,
Lu populu curria a gonfi veli,
Unu n'ittava li cunfetti,
N'autru cioccolatu e cannameli.
Trasianu camii e carretti
Di sfullati, amari comu feli,
Lu curuzzu afflittu e disulatu,
Lu paisi nfettu e mutilatu.

Chi granni ruvina, quantu danni!
Lu paisi riduttu na pantàna,
Chinu di macèri e di malanni
Pi la granni partazza disumana.
Patri Eternu, Divinu, tantu granni,
Tanti oltraggi a la fidi Cristiana,
Quantu morti, disastri nquantità,
Nuddu Santu chi nvucau pieta'.

Un granni pezzu grossu, Generali,
Dopu di la resa ha urdinatu
Chi ogni portu, appartenenti a lu stivali,
Vinìa cu la pulviri minatu.

Ricordu chi successu triunfali
Di l'esercitu chi n'avìa libiratu,
Satavanu portura e citati sani,
Pi tirari films Amiricani.

Lassamu li malanni e li duluri,
Passamu alla parti principali.
Morsi lu Duci nostru cundutturi,
Fuìu puru la famigghia Riali;
Lu populu senza cennu né culuri,
Tuttu sbandatu, comu l'animali.
Pocu passa, sona la campana,
Si fici la Repubblica Italiana.

Sicilia, tu povira e mischìna,
Abituata sempri a travagghiari,
Ridutta senza un cocciu di farina,
Lu Populu si misi a ribillari.
Rumpennu li porti a li mulìna,
Trasianu, pi viriri e tuccari
E si facià la partazza e lu dilittu,
Custritti, assicutati du pitittu.

NPalermu l'Altu Cummissariatu
Circava d'asciugari la pantana;
Di l'America lu nostru parintatu
Manna la prima pasta amiricana.
Lu populu murtizzu, affamatu,
Nesci a tutta cursa di la tana,
A lu spacciu currianu cuntenti
Cu pinsero d'affettu a li parenti.

Li parenti cughieru la culletta,
L'America quantu cosi chi nni detti,
Di li causi a la giacchetta,
Di li mutanni finu a li cuasetti,
Robba usata e cu etichetta.
Quanti linzola e quanti cuperti.
Robba ni mannau un arsinali,
Quantu vapura di midicinali!

Stu populu cumencia a caminari,
La testa ancora china di pinseri,
Li famigghiuzzi stavanu a aspittari
Li nostri surdateddi prigiunieri.
Avianu piccati di scuntari
A soffriri nmezzu li straneri;
Truvannu na scorcia di patati,
Facianu li lotti cchiù sirrati.

Auguri a chiddi chi turnaru,
Pi cu morsi n'arristau lu turmentu.
Li nostri Capi li cummimuraru,
Stannu ncisi nta lu Munumentu.
A la morti nun c'è cchiù riparu,
Nni resta duluri e patimentu.
Bastanu sulu li cummemurati,
Chi ci fannu li nostri Deputati.

La Sicilia nni chiama all'attinzioni,
Nun vonnu fari parti a lu stivali,
Criaru chista granni cunfusioni,
Fari stu Governu Reggionali.

Quattru marpiuna e denti bboni
Comu l'aceddi si raperu l'ali,
Tiraru di lu saccu un facottu,
La liggi cu l'articulu trentottu.

La Sicilia pi cent'anni abbannunata,
Abbannunatu ogni sicilianu,
Fu di Garibaldi libirata
E cunsignata a lu nostru Suvranu.
Nun riciviù mai na cazzulata!
Li navi salutava di luntanu,
Pagannu forti tassi e mpidimenti,
A binificiu di lu Cuntinenti.

Pi richiamari li risarcimenti
E putiri rivisciri lu mortu,
Ficiru sta Reggioni ch'è presenti,
Ricca di l'articulu trentotto.
Pi vint'anni s'ha fattu l'insistenti,
P'aviri chistu pocu di risottu.
Cunigghiu nsisti, Moru l'abboccia;
Sti sordi vennu cu cuntagoccia!

Lassamu tutta sta pirsuasioni,
Passamu a la frasi ditta antura,
Facemu u Prisidenti da Reggioni,
Pinsamu pi acchianari l'Assissura.
Comizi, genti, cunfusioni,
Li battuti di manu e la cinzura;
Cu porta l'acqua, lu vinu, li patati
E travagghiu pi l'invernu e pi l'estati.

Granni comizi, chiazzi affullati,
Lu populu si pripara pi vutari,
Machini, spillacchi strati strati,
Li vicchiarreddi stannu addistrari,
Pi mettiri la cruci ne stampati,
Pi essiri sicuri a lu vutari.
Si fici la Regioni Siciliana,
Forti, democratica e baggiana!

Democrazia ancora criatura,
Nun avìa vint'anni comu ora,
Era mezza vistuta e mezza nura,
Nte fasci cu li natichi di fora.
Picciridda si ittau a la vintura,
Cumencia a caminari sora sora.
Vint'anni di fangu e arca marina,
Ora si senti na gran signurina!

Signurina comu na caiorda,
Figghia di Cicciu, Bittuzzu e Narda,
L'occhi pisciati, lu nasu a corda,
Licca, panzuta, chiù chi sta s'allarda,
Pensa pi idda e dunni sborda sborda,
Tinta, rachitica e tistarda,
La facci truccata di milli culura,
Lagnusazza, porca e macarura.

Na fimminazza troppu avvizzata,
Chi si trascina li fimmineddi bboni
Sutta la granni nsegna dilicata,
Sutta malignitati e curruzzioni.

Vutàti lu sguardu pi la strata,
L'occhi, l'aricchi, rapitili bboni:
Invece di malanni risanari,
Costringinu l'operaiu ad emigrari!

Soffrinu figghi, patri cu mughieri,
Comu si sta senza emigrari?
Ccà s'aspetta sempri lu cantieri,
Ddi milli liri, ch'un si pò mangiari!
E quannu arriva chiddu chi succeri,
Sempri li stessi fannu travagghiari;
Lu democraticu subito nfiretta
E c'è cu ci passa l'annu e sempri aspetta!

Nuddu ci pensa pi li puvireddi!
Li grossi sunnu sempri sistimati,
Vistuti d'etichetta, cu cappeddi;
Si fannu li mangiati e li scialati,
Hannu lu spassu, cu li fimmineddi
Si fannu li strinciuti e li vasati.
E dopu chi s'hannu divirtutu,
A la funciazza di chiddu ch'è partutu!

Guardati l'afflittu diplomatu,
Sularinu, v'è circannu postu,
Veni sempri di tutti lusingatu.
Alinquannu c'è chiddu ch'è cchiù tostu,
Si presenta a qualchi Deputatu,
Dicennu, di pagari sù dispostu.
E certuni pi lu postu dari
Prima ni divennu a cuntattari!

Cu dumanna gran summi di dinari,
Cu fà li patti cunvinziunati,
Cu voli cusuzzi di mangiari,
Cu voli villini e fabbricati,
Cu voli la parti di salari,
Cu voli la farina e li patati,
E puru cinn'esti nta la quantità
Chiddi chi pritenninu u baccalà!

Nutati, ogni Sinnacu chi fannu,
Ddi novi mpiati pedi pedi:
Li parintuzzi di so patri, di so nannu,
Li parenti a parti larga da muggghieri,
Statici attenti, si vannu mpustannu
Tutti l'Assissura e Cunsigghieri.
Analfabeti cu posti civili,
Beddi, attunniati di lu gran minsili!

Poi nun parlamu di li vastasati,
Chi si notanu nta li costruzioni,
Cu tutti sti grattaceli e palazzati,
Fora fasi di prugettazioni;
Poi li vonnu mparti sdirrupati
Cu l'Urdinanzi di demolizioni.
Cu si sta a lu Sinnacu affiatatu,
Lu so grattacelu unn'è tuccatu.

Chi nni dici sta bedda signurina?
Soccu ha fattu nta li so vint'anni?
Lu bongiornu si vidi la matina!
È tutta assillata di malanni,

Ammuccia tuttu sutta la vistina,
Cacata di la suttana a li mutanni.
Nun si tratta di fari sparlamentu,
Visitati la povira Girgentu.

Viriti chi disastri, chi lamentu,
Davanu o tirrenu troppu pisu,
Cc'era cu fabbricava u munumentu,
Nautru u grattacelu vastu e tisu;
Li capi ufficiu, senza ntirissamentu,
Facianu occhju a lu prumisu.
All'ultimu sintistu i risultati:
Morti, disastri, genti cunsumati!

Semu tutti cumminati bboni,
Nunn'avemu cchiù dunni arrivari.
A munti frani e divastazioni,
A quali Santu nn'avemu adurari?
A valli distruggi tuttu l'alluvioni,
Sulu la morti nni putrà salvarì.
Ormai lu nostru passu fu signatu:
Militari, emigranti o alluvionatu.

Pensu e ripensu, Sicilia mia,
Li to tri valli ricchi e sapienti,
Ricca di cantu e vera puisia,
Di cosi naturali diffirenti,
Ricca d'arti, pittura, fantasia,
Duci lu clima, lu sulì splendenti.
Matri diletta, sì un gran tisoru,
Ti chiama lu turista conca d'oru.

Sicilia latu occidentali,
Riccu, di tunnari circundatu;
Custunaci di lu munnu è la rivali,
Lu sò marmuzzu lisciu e villutatu;
Amata Trapani ricca di sali,
Dai a lu pranzu gustu e palatu;
Lu tò vinuzzu gustusu e pungenti
Tuttu lu munnu lu vivi e lu senti.

L'oppostu latu, Catania, Missina,
Tuttu lu cumplèssu sicilianu,
A Siracusa la Matri Divina,
Catania, Taurmina e lu vulcanu;
Fistusa Palermu, muntagni e marina
Cu l'architettu Grecu e Tuscanu;
Aranci, lumuna, villini cu ciuri,
Bedda Sicilia, terra d'amuri!

E tu sicilianedda tanta bruna,
Picciridduzza china di caluri,
Nfucata di lu vulcanu tradituri,
L'occhi castagni, la facci di luna,
La tò vuccuzza, lu pettu, li masciddi,
Biatu cu ti vasa e ti cunnuci,
Chi di li peri finu a li capiddi
Siciliana, si bedda e tutta duci!

Picciutteddi schetti e maritati,
Nun facitivi di li chiacchiari mbrucchiari,
Li vostri patri foru tutti cutuliati,
La giuvinizza nun la vittiru passari.
Vittimu li bummi, li cannuna, li fragati,

Chi ficiru lu munnu subbissari.
Scigitivi li stringiuti, li vasati,
Lu pani, lu travagghiu, l'alligria;
Lassati ragghiari a tutti quantu sunnu,
Divirtitivi e guditivi lu munnu!

Signurina, c'hai li tò vint'anni,
Simbulu di gran democrazia,
Ormai si fatta na fimmina granni,
Nescitinni di mmezzu sta lurdìa,
Pulisciti sta vistina, sti mutanni,
Un terzu di populu chi ti schifìa;
Si ti fai lu bagnu veramenti,
Tuttu lu populu s'abbrazza a tia!